



Bentiaraq Ottosen
Atassut

UKA 2023/47
18. oktober 2023

Naartunermi, erninermi meeravissiarthaarnermilu sulinnigiffeqartarneq pillugu Inatsisartut inatsisaat nr. 5, 19. november 2020-imeersoq UKA24-mut allannguutissaanik siunnersuusioqqullugit Naalakkersuisut peqquneqarnissaannik inatsisartut aaliangiiffisassaattut siunnersuut, taamaaliornikkut ataataaqataasup ernereernerup, meeravissiarthaareernerulluunniit kingorna anaanaaqataasut assigalugit sulinnigiffeqarsinnaalerseqqullugu.

(Inatsisartunut ilaasortaq Peter Olsen, Inuit Ataqatigiit)

Siullermeenera

Inatsit tunngaviusoq eqqarsaatigigaanni apeqqutaavoq suna sumilu eqqarsaatigineqarsimanersut, naartunermi, erninermi, meeravissiarthaarnermilu sulinnigiffeqartarneq pillugu suiaaqatigiinni arlaannaatigut ulluinnarni attuinninnissaa pisariaqartinneqarpat isumaqarpunga nalilersorneqarsinnaassasoq.

Taamaattumik isumaqarpunga siunnersuuteqartumut, siunnersuut pillugu sunarpiaruna uani saqqummiuniarneqarnerisooq. Isumaqaramami allamik pingaarutilerujussuaqartoq, sulii erninerup kingorna sulinnigiffeqartarneq pillugu iluarsagassaqarpoq. Tassani annertuumik allaffissorpallaarnerup kinguneranik ilaqtariinngorlaat aningaasaqarniarnermikkut ajornartorsiuteqartarput aali suliffeqaraluarlutik ataavartumik, allaffissorpallaarnerup pillugu aningaasaqarnikkut eqqorneqartarlutik. Tassa pissutsit piviusut taamaapput, taamaattumik uani inatsit pillugu sulii qulaajagassaqartoq isumaqarpunga. Taamaattumik una siunnersuut ataasiinnaavallaamik isiginera uggoraara pissutigalugu sulii kiffartuussinerup iluani equngasoqaraluartoq, isumaqarpungali ataatsimiititaliap suliaralugu aamma ilanngutissagaa tamanna. Qulaajaasoqartariaqarmammi sulii.

Atassummiit siunnersuut ataatsimiititaliamut susassaqartumut ingerlateqqipparput, qulaajagassaqarnera pillugu.